

**Date – 10/06/2024**

**Time - 7:30 -7:40Hrs**

## **REGIONAL NEWS BULLETIN**

### **HEADLINES (MORNING)**

1. Prime Minister Narendra Modia chu nizan khan a term thum nan rinawmna thutiam tira lakluh a ni.
2. Kumin thla 5 chhungin Mizoram Police-te chuan heroin kg. 38 leh gram 651 an man tawh.
3. Run lei bomb chhiat avangin Teddim kaltlanga Tahan atanga Mizorama Myanmar sumdawng bungrua lakluh chu tihtawp rih a ni.

<><><>

### **PM SWORN IN**

Prime Minister Narendra Modia chu nizan khan a term thum nan rinawmna thutiam tira lakluh a ni.

Rastrapati Bhavan-a lakluh inkhawmah President Draupadi Murmu chuan Prime Minister Modia hi rinawmna thutiamtirnin a lalut a. Prime Minister rual hian Council of Ministers lakluh tel an ni a. Cabinet Minister 31, Minister of State (independent charge) panga leh Minister of state 36 lakluh a.

BJP hruaitu senior zingah Rajnath Singh, Amit Shah, Nitin Gadkari, Dr S Jaishankar, Piyush Goyal, Dharmendra Pradhan, Nirmala Sitharaman leh BJP President J P Nadda te chu Cabinet Minister atana lakluh zingah an tel a. Anni bakah hian Kiren Rijju, Pralhad Joshi, Giriraj Singh, Ashwini Vaishnaw, Jyotiraditya Scindia, Bhupender Yadav, Gajendra Singh Shekhawat, Annapurna Devi, Hardeep Singh Puri, Dr Mansukh Mandaviya, G Kishen Reddy leh C R Patil, Dr Virendra Kumar leh Jual Oram te cabinet Minister atan lakluh an ni bawk a. Madhya Pradesh State Chief Minister hlui Shivraj Singh Chouhan, Haryana Chief Minister hlui Manohar Lal Khattar leh Assam Chief Minister hlui Sarbanand Sonowal te pawh Cabinet Minister tura lakluh an ni a. Hei bakah hian Karnataka Chief Minister hlui leh JD(S) MP H.D. Kumaraswamy, Bihar Chief Minister hlui leh HAM party chief Jiten Ram Manjhi, JD(U) MP Rajiv Ranjan Singh, TDP MP Kinjarapu Ram Mohan Naidu leh LJP (Ramvilas ) Chief Chirag Paswan te pawh cabinet minister-a lakluh zingah an tel a. BJP leader Rao Inderjit Singh, Dr Jitendra Singh leh Arjun Ram Meghwal bakah Shiv Sena atangin Prataprao Jadhav leh RLD Chief Jayant Chaudhary te Ministers of State ( Independent Charge) rinawmna thutiam tira lakluh an ni bawk.

Minister of state 36 lakluh zingah BJP MP Jitin Prasad , Shripad Yesso Naik, Pankaj Chaudhary, Nityanad Rai, Krishan Pal, V Somanna, S P Singh Baghel leh Shobha Karandlaje, Suresh Gopi. Raksha Khadse, Ajya Tamta, Bandi Sanjay Kumar, Kamlesh Paswan, Harsh Malhotra, Satish Dubey leh Ravneet Sing Bittu bakah RPI hruaitu Ramdas Athawale, JD (U) hruaitu Ramanth Thakur, Apna Dal (S) Anupriya Patel leh TDP hruaitu Dr. Pemmasani Chandrasekhar te an tel a ni.

Prime Minister leh Council of Minister laklulh inkhawmah hian rampawn atanga hruaitu engemawzat an rawn tel a ni. Heng zingah hian Sri Lanka President Ranil Wickremesinghe, Maldives President Dr. Mohamed Muizzu, Seychelles Vice President Ahmed Afif, Prime Minister of Bangladesh Sheikh Hasina, Prime Minister of Mauritius Pravind Kumar Jugnauth, Prime Minister of Nepal Pushpa Kamal Dahal 'Prachanda' leh Prime Minister of Bhutan Tshering Tobgay te an tel a ni.

Ramchhunga mi paiwmawh tak tak Vice President Jagdeep Dhankhar, Chief Justice of India Dr D.Y. Chandrachud, Congress President Mallikarjun Kharge, Bihar Chief Minister leh JD(U) president Nitish Kumar, Andhra Pradesh Chief Minister-designate N Chandrababu Naidu, Uttarakhand Chief Minister Pushkar Singh Dhami, Uttar Pradesh Chief Minister Yogi Adityanath, Manipur Chief Minister N Biren Singh, Haryana Chief Minister Nayab Singh Saini leh Maharashtra Deputy Chief Minister Ajit Pawar te an tel bawk a ni.

<><><>

### **POLICE DRUG SEIZURE**

Kumin January thla atanga May thla tawp thleng khan Mizoram Police-te chuan heroin kg. 38 leh gram 651 an man tawh.

IGP (Law and Order) Pu Lalbiakthanga Khiangte hnen atanga Akashvani Aizawl thu dawn danin thla 5 chhunga Police-te heroin man hi tualchhunga an hralh danin cheng vaibelchhe 11 leh nuai 59 chuang hu a ni a. Heroin tawlh man chhuah chungchangah hian Police-te chuan Mizoram hmun hrang hrangah thubuui 154 ziak lutin inhnawnawihah puh mi 209 an man tawh a ni. Police-te hian thla 5 chhung vek hian Methamphetamine kg. 89 leh gram 445 an man a, an Methamphetamine man hi cheng vaibelchhe 11 leh nuai 62 hu-in an chhut a. Methamphetamine bakah hian a muma siam ni ve lo Crystal Meth kg. 13 leh gram 49 an man bawk a. Crystal Meth hi a to hle niin an sawi a, an man hi cheng vaibelchhe 40 leh nuai 47 hu zet niin an sawi. Methamphetamine leh Crystal Meth kaihhnawihah hian thubuui 11 ziahluh a ni a, mi 17 man an ni.

Nikum, 2023 kha Mizorama Police-te'n heroin an man tam ber kum a la ni a, nikum chhung khan heroin kg. 68 leh gram 055 an man a. A hun lai a tualchhunga heroin an hralhna rate-ah chuan cheng vaibelchhe 20 leh nuai 41 hu zet a chhut a ni. Nikum chhung vek khan Methamphetamine kg. 154 leh gram 172 an man a, a hun lai rate angin cheng vaibelchhe 20 leh nuai 4 hu a ni a. Crystal Meth hi kg. 49 leh gram 5 an man a, hei hi a hun lai a tualchhunga an hralhna rate chu cheng vaibelchhe 147 leh nuai 1 hu a ni an ti. Nikum chhung vek hian Methamphetamine siamna atana an hman Pseudoephedrine kg. 210 leh gram 72 zet man a ni bawk. Nikum chhung khan heroin tawlh ruk kaihhnawihah thubuui 232 ziahluh a ni a, mi 325 man an ni bawk a. Methamphetamine tawlh chungchangah thubuui 16 ziaklutin mi 25 man an ni bawk a. Crystal Meth chungchangah thubuui 6 ziaklutin mi 9 an man bawk a ni.

<><><>

### **AIZAWL POST OFFICE**

Aizawl Dak Inpui chu mipuiin an hmang tangkai hle a, nikhatah parcel 1,000 chuang thawn chhuah thin a ni.

Dak inpui hian dawrtu an ngah thin avangin thawktu indaihlo na a nasa hle. Asst Post Master Pu KL Zohmingliana hnen atanga kan Corr thudawn danin Phai lam atanga bungraw lo kal chu National sorting hub-ah a lut khawm a, chuta tang chuan district dangah an thawn chhuak thin a. Parcel pakhatah kg 30 ai a rit bungrua

a thawn theih loh thu Pu KL Zohmingliana chuan sawiin Speed post bik a thawnte chu thlawhna hmanga a thawn thin niin a bak Registered Parcel a bungraw thawn te chu Silchar atanga surface Mail a an thawn thin thu a sawi.

Aizawl Asst. Post Master chuan thlawhna a bungrua an thawnah, alh thei thil, battery, zuk leh hmuam, Thil hriamte chu thawn khap a nih thu sawiin, thawn lui an lo awm thin thu leh mipuite pawh an bungraw thawnah fimkhur zuala heng an khap thilte chu thawn lo hram turin a chah bawk.

Parcel thawnehhuah chungchangah mipuite dan khap thilte thawn lui lo tur leh an bungraw thawn te a lo him zawk theih nan uluk taka an bungrua te fun thin turin Mipuite an chah. Thil thawn duhte'n harsatna an nei a nih chuan Dak Inpui a kal kher lo in phone hmang pawha biakpawh theih reng an nih thu a sawi bawk.

<><><>

#### MYANMAR WARES IN CHAMPHAI

Run lei bomb chhiat avangin Teddim kaltlanga Tahan atanga Mizorama Myanmar sumdawng bungrua lakluh chu tihtawp rih a ni.

Mizoram Myanmar atanga sumdawng bungraw chi hrang hrang leh ei leh in tur a lakluhna kawngpui ber, Teddim leh Zokhawthar inkara lei pawimawh tak, Run lui chungah dawh chu bomb chhiat a nih avangin Inrinni atang khan Myanmar atangin Mizoram lam ah bungrua a rawn lut mumal thei lova. Tahan atanga Teddim kal tlanga Myanmar bungrua, Mizorama lo lut thin chu a tawp vek rih a ni.

Champhai a kan Corr Lalhlupui-a'n a sawi danin Inrinni zing karah khan Run lui kal kaina Lei, feet 20 vela zau leh Feet 300 vela thui, (Suspension bridge) chu Myanmar Sipai, State Administration Council mi leh sa ni a hriatte'n bomb hmangin an tichhia a. He lui hi lirthei leh kea kalte tan pawh kal kai theih a ni rih lo. Chuvangin Tahan atanga zawrh tur thil mipui nitin mamawh bungrua a rawn lut thei ta rih lo a ni. Hetihlai hian Tahan leh Falam inkara, Run Lei, Var lei an tih chu lirthei leh ke a kalte'n tluang takin an la zawh thei a, a kawng thui-in hla zawk pawh ni se, Falam atangin Mizoram a Zokhawthar lamah Myanmar bungrua hi rawn lut leh thei tura beisei a ni.

<><><>